

LE CHAPITRE DE LA FENTE,
contenant vingt-cinq versets,
escriit à la Meque.

AV nom de Dieu clement & misericordieux. Le iour du iugement paroitra lors que le Ciel se fendra, & que la terre jettera les hommes hors des monumens par le commandement de Dieu. O homme tu vas tous les iours à la mort & treuueras à la fin le bien & le mal que tu auras fait, celuy à qui on donnera le liure de compte de ses actions à la main droite fera bien-heureux, il ira avec ses compagnons en Paradis où il iouïra d'une eternelle felicité, celuy à qui on dónera le liure de compte de ses actions à la main gauche fera damné, il sera precipité dedans le feu d'Enfer à cause des plaisirs illicites qu'il a pris dans le monde, & parce qu'il n'a pas crû en la resurrektion, Dieu void tout ce qu'il fait, & en tient compte. Je iure par la rougeur qui paroît en l'air, lors que le Soleil se couche, par l'obscurité de la nuit, & par la clairté de la Lune que vous changerez tous d'estre & de posture, & que vous ressusciterez apres vostre mort. Pourquoy est-ce que les impies ne croyent pas en Dieu? pourquoy ne s'humilient ils pas quand ils entendent lire l'Alcoran? ils blasphemement contre Dieu, mais il sçait tout ce qu'ils font, annonce-leurs qu'ils seront

seront chastiez, & que ceux qui croient en son vnité & qui font de bonnes œuures, receuront vne recompense infinie.

LE CHAPITRE DES SIGNES
cælestes, contenant vingt versets,
escriit à la Meque.

Plusieurs Docteurs l'intitulent le Chapitre des Chasteaux.

AV nom de Dieu clement & misericordieux. Je iure par le Ciel orné de signes, par le iour du iugement, par les Anges & par les hommes, que ceux qui ont fait des fossés remplis de feu pour brusler les vray-croyans, seront tesmoins de leurs propre malice, & aduouèront que le feu les a bruslé eux-mesmes, pour leur faire cognoistre l'vnité de Dieu, & la verité de sa loy; Dieu est tout-Puissant & toujours victorieux, il est Roy des Cieux & de la Terre, il void tout; Ceux qui tourmenteront les vray-croyans & ne se conuertiront pas, seront damnez, ils brusleront eternellement dedans le feu d'Enfer, & ceux qui croiront en Dieu & qui feront de bonnes œuures demeureront dans des iardins delicieux où coulent plusieurs fleues où ils iouïront à iamais d'une suprême felicité. La colere de Dieu est forte, il fait mourir, & ressuscciter